



*Exhortation de Iesus sur les principaux poinçts de la Religion ,
que chacun doit obseruer.*

DONC Iesus continuant ses exhortations, nous baille des preceptes que nous deuous tenir pour paruenir à la vie bien-heureuse, disant, Nul ne peut seruir à deux Maistres, sçauoir à Dieu & aux richesses : ne soyez en soucy de ce que boirez ou mangerez, ou dequoy vous serez vestus ; car la vie est beaucoup plus que la viande, & le corps plus que le vestement, regardez les oyseaux de l'air, ils ne sement ne moissonnent, & n'assemblent en greniers, & vostre Pere celeste les nourrit : N'estes vous pas beaucoup plus excellens qu'eux ? Considerez comme croissent les lys des champs, ils ne trauillent & ne filent point ? neantmoins Salomon en toute sa gloire n'a point esté vestu ny accoustré comme l vn d'iceux. Cherchez premierement le Royaume de Dieu, & toutes choses vous seront adjoustées. Ne iugez point afin que ne soyez iugez, car de telle mesure que vous mesurerez on vous mesurera. Pourquoi regarde-tu le festu en l'œil de ton frere, & tu n'apperçois point la poutre qui est en ton œil. Ne donnez point les choses saintes aux chiens, ny les marguerites aux pourceaux : demandez, & il vous fera donné : cherchez & vous trouuerez. Y a-il homme d'entre vous, que si son fils luy demande du pain qu'il luy donne vne pierre ? & s'il luy demande du poisson, luy donnera-il vn serpent ? Si donc vous qui estes mauuais sçauiez donner à vos enfans choses bonnes, combien plus vostre Pere celeste fera-il des biens à ceux qui le requierent.